

四庫全書

集部

欽定四庫全書

集部

御選唐宋詩醇卷二十八

詳校官侍講_臣王燕緒

主事銜_臣徐以坤覆勘

總校官降調編修_臣倉聖脉

校對官編修_臣吳舒帷

謄錄監生_臣薩龍光

欽定四庫全書

御選唐宋詩醇卷二十八

昌黎韓愈詩二

目錄

赴江陵途中寄贈王二十補闕李十一拾遺李二
十六員外翰林三學士

此日足可惜一首贈張籍

歸彭城

醉贈張秘書

送惠師

送靈師

縣齋有懷

陪杜侍御遊湘西兩寺獨宿有題一首因獻楊常侍

岳陽樓別竇司直

送文暢師北遊

答張徹

欽定四庫全書

御選唐宋詩醇卷二十八

昌黎韓愈詩二

赴江陵途中寄贈王二十補闕李十一拾遺李二

十六員外翰林三學士

孤臣昔放逐血泣追愆尤汗漫不省識恍如乘桴浮或
自疑上疏上疏豈其由是年京師旱田畷少所收上憐
民無食征賦半已休有司恤經費未免煩徵求富者既

云急貧者固已流傳聞閭里間赤子棄渠溝持男易斗粟掉臂莫肯酬我時出衢路餓者何其稠親逢道邊死佇立久咿嚶歸舍不能食有如魚中鉤適會除御史誠當得言秋拜疏移閤門為忠寧自謀上陳人疾苦無令絕其喉下陳畿甸內根本理宜優積雪驗豐熟幸寬待蠶麤天子惻然感司空歎綢繆謂言即施設乃反遷炎州同官盡才俊偏善柳與劉或慮語言洩傳之落冤讎二子不宜爾將疑斷還不中使臨門遣頃刻不得留病

妹卧牀褥分知隔明幽悲啼乞就别百請不領頭弱妻
抱稚子出拜忘慙羞僂僂不迴顧行行詣連州朝為青
雲士暮作白首囚商山季冬月冰凍絕行輶春風洞庭
浪出沒驚孤舟逾嶺到所任低顏奉君侯酸寒何足道
隨事生瘡疣遠地觸途異吏民似猿猴生瘡多忿恨辭
舌紛嘲啁白日屋簷下雙鳴鬪鵠鷗有蛇類兩首有蟲
羣飛游窮冬或搖扇盛夏或重裘颺起最可畏旬哮簸
陵丘雷霆助光怪氣象難比侔癘疫忽潛邁十家無一

瘳猜嫌動置毒對案輒懷愁前日遇恩赦私心喜還憂
果然又羈縻不得歸耒耨此府雄且大騰凌盡戈矛棲
棲法曹掾何處事卑陬生平企仁義所學皆孔周早知
大理官不列三后傳何況親狴獄敲擿發姦偷懸知失
事勢恐自罹置杲湘水清且急涼風日脩脩胡為首歸
路旅泊尚夷猶昨者京師至嗣皇傳冕旒赫然下明詔
首罪誅共咎復聞顛天輩峨冠進鴻疇班行再肅穆瑄
珮鳴琅璆佇繼貞觀烈邊封脫兜鍪三賢推侍從卓犖

傾枚鄒高議參造化清文煥皇猷協心輔齊聖政理同
毛輜小雅詠鳴鹿食苹貴呦呦遺風邈不嗣豈憶嘗同
稠失志早衰換前期擬蜉蝣自從齒牙缺始慕舌為柔
因疾鼻又塞漸能等薰蕕深思罷官去畢命依松楸空
懷焉能果但見歲已道殷湯閔禽獸解網祝蛛蝥雷煥
掘寶劍冤氛銷斗牛茲道誠可尚誰能借前籌殷勤謝
吾友明月非暗投

此自陽山量移江陵而寄王涯李建李程意在牽復耳

有求於人易涉貶屈而齒缺鼻塞等語借失志衰換寫
意似有懲創然只以詆諧出之固知倔强猶昔不肯折
却腰骨也意纏綿而詞悽婉神味極似小雅

舊唐書愈轉監察御史德宗晚年宮市之弊愈嘗上
章數千言極論之不聽怒貶為連州陽山令量移江
陵府掾曹

洪興祖曰貞元十九年公自博士拜監察御史是時
有詔以旱饑蠲租之半有司徵愈急公與張署李方

叔上疏言關中天下根本民急如是請寬民徭而免
田租天子惻然卒為幸臣所讒貶連州陽山令幸臣
李實也舊書云云疏今不傳則公之被黜坐論此兩
事也

方崧卿曰公陽山之貶寄三學士詩敘述其詳而行
狀但云為幸臣所惡出宰陽山神道碑亦只云因疏
關中旱饑專政者惡之則其非為論宮市明矣然行
狀且謂為幸臣所惡而公詩云或自疑上疏上疏豈

其由則又未必皆上疏之罪也又曰同官盡才俊偏
善柳與劉或慮語言洩傳之落冤讎又岳陽樓詩云
前年出官由此禍最無妄姦猜畏彈射亦逐恣欺誑
是蓋為王叔文韋執誼等所排矣憶昨行云伍文未
揃崖州熾雖得赦宥常愁猜是其為叔文等所排豈
不明甚特無所歸咎駕其罪於上疏耳

此日足可惜一首贈張籍

此日足可惜此酒不足嘗捨酒去相語共分一日光念

昔未知子孟君自南方自矜有所得言子有文章我名
屬相府欲往不得行思之不可見百端在中腸維時月
魄死冬日朝在房驅馳公事退聞子適及城命車載之
至引坐於中堂開懷聽其說往往副所望孔邱歿已遠
仁義路久荒紛紛百家起詭怪相披猖長老守所聞後
生習為常少知誠難得純粹古已亡譬彼植園木有根
易為長留之不遣去館置城西笏歲時未云幾浩浩觀
湖江衆夫指之笑謂我知不明兒童畏雷電魚鼈驚夜

光州家舉進士選試繆所當馳辭對我策章句何煒煌
相公朝服立工席歌鹿鳴禮終樂亦闋相拜送於庭之
子去須臾赫赫流盛名竊喜復竊歎諒知有所成人事
安可恒奄忽令我傷聞子高第日正從相公喪哀情逢
吉語愴恍難為雙暮宿偃師西徒展轉在牀夜聞汴州
亂遶壁行徬徨我時留妻子倉卒不及將相見不復期
零落甘所丁驕女未絕乳念之不能忘忽如在我所耳
若聞啼聲中途安得返一日不可更俄有東來說我家

免罹殃乘船下汴水東去趨彭城從喪朝至洛還走不
及停假道經盟津出入行澗岡日西入軍門羸馬顛且
僵主人願少留延入陳壺觴卑賤不敢辭忽忽心如狂
飲食豈知味絲竹徒轟轟平明脫身去決若驚鳬翔黃
昏次汜水欲過無舟航號呼久乃至夜濟十里黃中流
上灘渾沙水不可詳驚波暗合沓星宿爭翻芒轅馬蹢
躅鳴左右泣僕童甲午憩時門臨泉窺鬪龍東西出陳
許陂澤平茫茫道邊草木花紅紫相低昂百里不逢人

角角雄雉鳴行行二月暮乃及徐南疆下馬步堤岸上
船拜吾兄誰云經艱難百口無天殤僕射南陽公宅我
睢水陽篋中有餘衣盎中有餘糧閉門讀書史窗戶忽
已涼日念子來遊子豈知我情別離未為久辛苦多所
經對食每不飽共言無倦聽連延三十日晨坐達五更
我友二三子宦遊在西京東野窺禹穴李翱觀濤江蕭
條千萬里會合安可逢淮之水舒舒楚山直叢叢子又
捨我去我懷焉所窮男兒不再壯百歲如風狂高爵尚

可求無為守一鄉

追溯與籍結交之始至今日重逢別去而其中歷叙已
之崎嶇險難意境紆折時地分明摹刻不傳之情并觀
縷不必詳之事倥偬雜沓真有波濤夜驚風雨驟至之
勢若後人為之鮮不失之冗散者須玩其勁氣直達處
數十句如一句尤須玩其通篇章法搏掄揅縱筆力如
一髮引千鈞庶可神明於規矩之外

六一詩話曰退之筆力無施不可而嘗以詩為文章

末事故其詩曰多情懷酒伴餘事作詩人也然其資
談笑助諧謔叙人情狀物態一寓於詩而曲盡其妙
此在雄文大手固不足論而予獨愛其工於用韻也
蓋其得韻寬則波瀾橫溢泛入傍韻乍還乍離出入
回合殆不可拘以常格如此日足可惜之類是也得
韻窄則不復傍出而因難見巧愈險愈奇如病中贈
張十八之類是也余嘗與聖俞論此謂譬如善馭良
馬者通衢廣陌縱橫馳逐惟意所之至於水曲蟻封

疾徐中節而不少蹉跌乃天下之至工也聖俞戲曰
前史言退之為人本強若寬韻可自足而輒僣出窄
韻難獨用而反不出豈非其拘強而然歟坐客皆為
之笑也

漁隱叢話曰唐子西謂退之作古詩有故避屬對者
淮之水舒舒楚山直叢叢是也

某氏曰按此篇押二光字二鳴字二更字二狂字胡
仔謂退之好重疊用韻以盡已之意蓋不恤其為病

也

容齋四筆曰退之此首贈張籍凡百四十句雜用東
冬江陽庚青六韻及其亡也籍作詩祭之凡百六十
六句用陽庚二韻其語鏗鏘震厲全倣韓體所謂乃
出二侍女合彈琵琶箏者是也李光地曰首叙與籍
相遇之初中言汴州之亂避難至徐復與籍相見而
惜其去也按詩易書春秋及秦漢以上古文用韻東
冬江為一部陽一部青一部庚則半入陽而半入青

也蒸自為一部支微齊佳灰為一部而支韻字半入
歌歌麻為一部而麻韻字半入虞魚虞為一部蕭肴
豪尤為一部尤韻字又以其半入支與虞焉真文元
寒刪先為一部侵覃鹽咸為一部此長洲顧寧人氏
所區別凡十部以合古韻其援据詳明而證驗的確
矣顧氏譏韓公不識古韻蓋謂此詩及元和聖德之
類然顧氏之學以質於詩書古今合者為多至聲氣
之元歌樂之用古人所以協律同文之本則似有未

能明者蓋東冬江陽庚青蒸七韻原為一部以其元
乃一氣所生而用之以叶歌曲則收聲必同故也真
大元寒刪先及侵覃鹽咸皆然至支微齊魚虞歌麻
諸韻又各部之根凡各部中字生音起韻皆從此而
得應自為一部而通同之欲其源派分明故亦別為
三部歌麻也魚虞也支微齊也然魚虞之韻能生蕭
肴豪尤故蕭肴豪尤與魚虞同一收聲而可以通用
支微齊能生佳灰故佳灰與支微齊同一收聲而可

以通用也至歌麻與魚虞雖別部而尤相近蓋古人
讀魚虞字皆如模字讀麻字皆如歌字緣歌模兩字
相近其收聲亦頗同則魚虞可通於蕭肴豪尤者歌
麻亦可通矣如東冬七韻真文六韻侵覃四韻雖亦
支微魚虞齊歌麻所生然翻轉於齒舌唇鼻間而得
之非喉音直切所生如蕭肴豪尤佳灰者比故各自
為部而不可相通也退之此詩正用東冬等一部聖
德詩則用歌魚虞尤等上聲一部謝自然詩則用真

文等一部皆極本窮源得古韻之精意其學博而見卓矣且三代秦漢古書如此者頗衆第主於先入則不察耳歐公以為有意泛入旁韻以見奇又或以為當以叶聲求之此固淺近之論而顧氏之顯為譏斥亦未免苟訾也

顧嗣立曰洪興祖謂此詩雜用韻又疊用韻俞琰云此詩用韻非雜也古庚陽二韻原自相通觀鹿鳴采芑之詩自見却非俗說通用轉用之例也其入東韻

者桑中之詩亦然按少陵飲中八仙歌嘗疊用韻此詩中間叙次亦仿佛彭衙北征光景

歸彭城

天下兵又動太平竟何時訐謨者誰子無乃失所宜前
年關中旱閭井多死飢去歲東郡水生民為流屍上天不
虛應禍福各有隨我欲進短策無由至彫墀剝肝以為
紙瀝血以書辭上言陳堯舜下言引龍夔言詞多感激
文字少歲華一讀已自怪再尋良自疑食芹雖云美獻

御固已癡緘封在骨髓耿耿空自竒昨者到京師屢陪
高車馳周行多俊異議論無瑕疵見待頗異禮未能去
毛皮到口不敢吐徐徐俟其熾歸來戎馬間驚顧似羈
雌連日或不語終朝見相欺乘閒輒騎馬茫茫詣空陂
遇酒即酩酊君知我為誰

憂時傷亂感憤無聊騎馬空陂不減途窮之哭周行俊
異數語風刺微婉所謂中朝大官老於事詎肯感激徒
嬖嬰也 剗肝瀝血句從少陵鳳凰臺詩化出又庾信

經藏碑有皮紙骨筆之句退之雖不喜用釋典然運化
前人詞語自無嫌也

醉贈張秘書

人皆勸我酒我若耳不聞今日到君家呼酒持勸君為
此座上客及余各能文君詩多態度藹藹春空雲東野
動驚俗天葩吐奇芬張籍學古淡軒鶴避雞羣阿買不
識字頗知書八分詩成使之寫亦足張吾軍所以欲得
酒為文俟其醺酒味既冷冽酒氣又氤氲性情漸浩浩

諧笑方云云此誠得酒意餘外徒續紛長安衆富兒盤
饌羅羶葷不解文字飲惟能醉紅裊雖得一餉樂有如
聚飛蚊今我及數子固無藉與薰險語破鬼膽高詞婉
皇墳至寶不雕琢神功謝鋤耘方今向泰平元凱承華
勛吾徒幸無事庶以窮朝曛

石林詩話曰韓退之贈張籍云君詩多態度藹藹春
空雲司空圖記戴叔倫語云詩人之辭如藍田日暖
良玉生煙亦是形似之微妙者但學者不能味其言

耳

顧嗣立曰東野二句即薦士詩所謂敷柔肆紆餘與
榮華肖天秀是也張籍二句即調張籍詩所謂騰身
跨汗漫不著織女襄是也亡友犀月嘗謂東野文昌
兩君所得極不相似而同為公所許足見公之才大
可謂知言矣

西清詩話曰張文潛云東坡嘗言退之詩長安衆富
兒盤饌羅羶葷不解文字飲惟能醉紅裊疑若清苦

自飾者至云艷姬踏筵舞清眸射劍戟則知此老子
箇中興復不淺文潛戲答曰愛文字飲者與俗人沽
酒同科

趙堯夫曰或問魯直阿買是退之何人答曰退之姪
必有所據而云

送惠師

惠師浮屠者乃是不羈人十五愛山水超然謝朋親脫
冠剪頭髮飛步遺蹤塵發跡入四明梯空上秋旻遂登

天台望衆壑皆嶙峋夜宿最高頂舉頭看星辰光芒相
照燭南北爭羅陳茲地絕翔走自然嚴且神微風吹木
石澎湃聞韶鈞夜半起下視溟波銜日輪魚龍驚踊躍
叫嘯成悲辛怪氣或紫赤敲磨共輪囷金鶚既騰翥六
合俄清新嘗聞禹穴竒東去窺甌閩越俗不好古流傳失
其真幽蹤邈難得聖路嗟長堙迴臨淞江濤屹起高峨
岷壯志死不息千年如隔晨是非竟何有棄去非吾倫
凌江詣廬嶽浩蕩極遊巡崔嵬沒雲表陂陀浸湖淪是

時雨初霽懸瀑垂天紳前年往羅浮步屐南海濬大哉
陽德盛榮茂恒留春鵬騫墮長翮鯨戲側脩鱗自來連
州寺曾未到城闌日攜青雲客探勝窮崖濱太守邀不
去羣官請徒頻囊無一金資翻謂富者貧昨日忽不見
我令訪其鄰奔波自追及把手問所因顧我却興歎君
寧異於民離合自古然辭別安足珍吾聞九疑好風志
今欲伸斑竹啼舜婦清湘沈楚臣衡山與洞庭此固道
所循尋嵩方抵洛歷華遂之秦浮游靡定處偶往即通

津吾言子當去子道非吾遵江魚不池活野鳥難籠馴
吾非西方教憐子狂且醇吾嫉情遊者憐子愚且諄去
矣各異趣何為淚霑巾

送靈師

佛法入中國爾來六百年齊民逃賦役高士著幽禪官
吏不之制紛紛聽其然耕桑日失隸朝署時遺賢靈師
皇甫姓盾胄本蟬聯少小涉書史早能綴文篇中間不
得意失跡成延遷逸志不拘教軒騰斷牽攀圍碁闕白黑

生死隨機權六博在一擲臬盧叱迴旋戰時誰與敵浩
汗橫戈鋌飲酒盡百觥嘲諧思逾鮮有時醉花月高唱
清且繇四座咸寂默杳如奏湘絃尋勝不憚險黔江屢
洄沿瞿塘五六月驚電讓歸船怒水忽中裂千尋墮幽
泉環迴勢益急仰見團團天投身豈得計性命甘徒捐
浪沫威翻涌漂浮再生全同行二十人覓骨俱坑填靈
師不掛懷冒涉道轉延開忠二州牧詩賦時多傳失職
不把筆珠璣為君編強留費日月容席羅嬋娟昨者至

林邑使君數開筵逐客三四公盈懷贈蘭荃湖游泛潯
沅溪宴駐潺湲別語不許出行裾動遭牽鄰州競招請
書札何翩翩十月下桂嶺乘寒恣窺緣落落王員外爭
迎獲其先自從入賓館占恠久能專吾徒頗攜被接宿
窮歡妍聽說兩京事分明皆眼前縱橫雜謠俗瑣屑咸
羅穿材調真可惜朱丹在磨研方將斂之道且欲冠其
顛韶陽李大守高步凌雲煙得客輒忘食開囊乞繒錢
手持南曹叙字重青瑤鐫古氣叅豕繫高標推太玄維

舟事干謁披讀頭風痊還如舊相識傾壺暢幽悃以此
復留滯歸驂幾時鞭

退之闢佛却頻作贈浮屠詩前篇但叙其放浪山水後
篇則干謁飲博無所不有所以稱浮屠者皆彼法之
所戒良以不拘彼法乃始近於吾徒且欲人其人而已
并未暇明先王之道以道之也二僧遊走諸方行止亦
畧相似而兩作各開生面絕不雷同是其匠心布置處
某氏曰按後漢明帝夢見金人問羣臣或曰西方有

神名曰佛其形長丈六尺而金色於是遣使天竺問
佛道法圖畫形象以歸其教因流入中國此詩據漢
明帝時言之耳故其佛骨表云自後漢時流入中國
又云漢明帝時始有佛法也漢武故事昆邪王殺休
屠王來降得其金人之神置之甘泉宮則是佛入中
國始自漢武至成哀間已有經矣杜致行守編亦曰
漢武作昆明池掘地得黑灰東方朔云可問西域道
人西域道人佛之徒也又開皇歷代三寶記云劉向

稱予覽典籍已見有經可知周時九流釋典秦雖熱
除漢興復出則先漢之前逆至於周有佛有經其來
也遠范曄胡以為明帝之時佛始入中國邪退之一
世大儒非承襲謬誤者將由心惡其教不復詳考其
源流所自耳

縣齋有懷

少小尚奇偉平生足悲咤猶嫌子夏儒肯學樊遲稼事
業窺臯稷文章茂曹謝濯纓起江湖綴珮雜蘭麝悠悠

指長道去去策高駕誰為傾國媒自許連城價初隨計
吏貢屢入澤宮射雖免十上勞何能一戰霸人情忌殊
異世路多權詐蹉跎顏遂低摧折氣愈下冶長信非罪
侯生或遭罵懷書出皇都銜淚渡清灞身將老寂寞志
欲死閒暇朝食不盈腸冬衣纔掩骼軍書既頻召戎馬
乃連跨大梁從相公彭城赴僕射弓箭圍狐兔絲竹羅
酒肉兩府變荒涼三年就休假如官去東洛犯雪過西
華塵埃紫陌春風雨靈臺夜名聲荷朋友援引之姻婭

雖陪彤庭臣詎縱青冥靶寒空聳危闕曉色曜修架捐
軀辰在丁鍛翮時方措投荒誠職分領邑幸寬赦湖波
翻日車嶺石拆天罅毒霧恒熏晝炎風每燒夏雷威固
已加颺勢仍相借氣象杳難測聲音吁可怕夷言聽未
慣越俗情猶乍指摘兩憎嫌睚眦互猜訝祗緣恩未報
豈謂生足藉嗣皇新繼明率土日流化惟思滌瑕垢長
去事桑柘斲蒿開雲扃壓潁抗風榭禾麥種滿地黎甿
栽繞舍兒童稍長成雀鼠得驅嚇官租日輸納村酒時

邀迓閒愛老農愚歸弄小女姘如今便可爾何用畢婚嫁

仄韻排律名手所希似此組織精工頗挫悲壯在集中亦自成一格 塵埃紫陌一聯與梅花灞水句同一風致

顧嗣立曰公詩句句有來歷而能務去陳言者全在於反用如醉贈張祕書詩本用嵇紹鶴立雞羣語偏云張籍學古淡軒鶴避雞羣送文暢詩本用老杜每

愁夜中自足蝸句偏云照壁喜見蝸薦士詩本用漢
書強弩之末力不能入魯縞語偏云強箭射魯縞嶽
廟詩本用謝靈運猿鳴誠知曙句偏云猿鳴鐘動不
知曙此詩結語本用向平婚嫁畢事偏云如今便可
爾何用畢婚嫁真令舊事翻新解得此秘則臭腐皆
化為神奇矣

某氏曰貞元十九年十二月公以監察御史上天旱
人飢疏貶陽山令辰在丁謂上疏之日也

陪杜侍御遊湘西兩寺獨宿有題一首因獻楊常

侍

長沙千里平勝地猶在險況當江濶處斗起勢匪漸深
林高玲瓏青山上琬琰路窮臺殿闕佛事煥且儼剖竹
走泉源開廊架崖广是時秋之殘暑氣尚未斂羣行忘
後先朋息棄拘檢客堂喜空涼華榻有清簟澗蔬煮蒿
芹水果剥菱芡伊余夙所慕陪賞亦云忝幸逢車馬歸
獨宿門不掩山樓黑無月漁火燦星點夜風一何喧杉

檜屢磨颺猶疑在波濤怵惕夢成魘靜思屈原沈遠憶
賈誼貶椒蘭爭妒忌絳灌共讒諂誰令悲生腸坐使淚
盈臉翻飛之羽翼指摘困瑕玷珥貂藩維重政化類分
陝禮賢道何優奉已事苦儉大厦棟方隆巨川楫行剡
經營誠少暇遊宴固已歎旅程愧淹留徂歲嗟荏苒平
生每多感柔翰遇頻染展轉嶺猿鳴曙燈青睽睽

從獨宿寫景生情先以客堂華榻引起猿鳴燈睽仍就
獨宿上結章法一綫

岳陽樓別竇司直

洞庭九州間厥大誰與讓南匯羣崖水北注何奔放瀦
為七百里吞納各殊狀自古澄不清環混無歸向炎風
日搜攪幽怪多冗長軒然大波起宇宙隘而妨巍峩拔
嵩華騰蹕較健壯聲音一何宏轟輶車萬兩猶疑帝軒
轅張樂就空曠蛟螭露筍簾縞練吹組帳鬼神非人世
節奏頗跌踴陽施見誇麗陰閉感悽愴朝過宜春口極
北缺堤障夜纜巴陵洲叢芮纔可傍星河盡涵泳俯仰

迷下上餘瀾怒不已喧聒鳴甕盎明登岳陽樓輝煥朝
日亮飛廉戢其威清晏息纖縵泓澄湛凝綠物影巧相
况江豚時出戲驚波忽蕩漾時當冬之孟隙竅縮寒漲
前臨指近岸側坐眇難望滌濯神魂醒幽懷舒以暢主
人孩童舊握手乍忻悵憐我竄逐歸相見得無恙開筵
交履烏爛漫倒家釀盃行無留停高柱送清唱中盤進
橙栗投擲傾脯醬歡窮悲心生婉孌不能忘念昔始讀
書志欲干霸王屠龍破千金為藝亦云亢愛才不擇行

觸事得讒謗前年出官由此禍最无妄公卿採虛名擢
拜識天仗姦猜畏彈射斥逐恣欺誑新恩移府庭逼側
厠諸將于嗟苦駕緩但懼失宜當追思南渡時魚腹甘
所葬嚴程迫風帆劈箭入高浪顛沈在須臾忠鯁誰復
諒生還真可喜剋已自懲創庶從今日後粗識得與喪
事多改前好趣有獲新尚誓耕十畝田不取萬乘相細
君知蠶織稚子已能餉行當掛其冠生死君一訪
寫景兩段陽開陰閉范希文岳陽樓記似從此脫胎

說文云茝茝草生貌又水涯也詩茝鞠之即箋水內曰茝水外曰鞠此云叢茝謂洲渚之地水草之間也

俞瑒曰此詩前半首寫景後半首述事却用追思南渡時數語挽轉真有千鈞之力且有此一段才見前此鋪張非漫然也可見公布局運筆之妙

送文暢師北遊

昔在四門館晨有僧來謁自言本吳人少小學城闕已窮佛根源粗識事輓輓攀拘屈吾真戒轄思遠發薦紳

秉筆徒聲譽耀前閥從求送行詩屢造忍顛蹶今成十
餘卷浩汗羅斧鉞先生閱窮巷未得窺剗剗又聞識大
道何路補剗則出其囊中文滿聽實清越謂僧當少安
草序頗排訐上論古之初所以施賞罰下開迷惑宵窵
豁斲株檠僧時不聽瑩若飲水救暍風塵一出門時日
多如髮三年竄荒嶺守縣坐深樾微徂聚異物詭製怛
巾幘幽窮共誰語思想甚含噦昨來得京官照壁喜見
蝎况逢舊親識無不比鷄鵬長安多門戶弔慶少休歇

而能勤來過重惠安可揭當今聖政初恩澤完賊狄胡
為不自暇飄戾逐鷗鷹僕射領北門威德壓胡羯相公
鎮幽都竹帛爛勲伐酒場舞閨姝獵騎圍邊月開張篋
中寶自可得津筏從茲富裘馬寧復茹藜蕨余期報恩
後謝病老耕墾庇身指蓬茅逞志縱獫狁僧還相訪來
山藥煮可掘

就北道主人作歌動語純是聲色貨利事昌黎胸次何
等乃作此腐鼠之嚇耶緣其惡異學甚於鄙俗情也

李光地曰先叙文暢求言而當日作序極陳古義以破其惑即今集中送文暢序是也中言被貶陽山自幸還見親識而僧之往來尤密後乃勸其逃墨來歸以詩文為緣足以自致且與為異日相從之約

俞琰曰公諸長篇用險韻都不傍借正所謂因難見巧不獨贈張十八一首也但江字韻為尤窄耳

聞見錄曰歐陽公於詩主退之不主子美劉仲原父每不然之公曰子美老夫清晨梳白頭玄都道士來

相訪有俗氣退之決不道也仲原父曰亦退之昔在
四門館晨有僧來謁之句之類公賞其辯

樊汝霖曰蘇內翰聞騾馱試筆余謫居黃州五年今
日離泗州北行岸上騾馱聲空籠意亦欣然蓋不聞
此聲久矣退之照壁喜見蝎不虛語也又嶺南歸云
已脫問鵬之變行有見蝎之喜皆取諸此

答張徹

辱贈不知報我歌爾其吟首叙始識面次言後分形道

途繇萬里日月垂十齡
浚郊避兵亂睢岸連門
停肝膽一古劒波濤兩
浮萍漬墨竄舊史磨丹
注前經義苑手祕寶文
堂耳驚霆暄晨躡露舄
暑夕眠風櫺結友子讓
抗請師我慙丁初味猶
噉蔗遂通斯建瓴搜竒
日有富嗜善心無寧石
梁平佺佺沙水光泠泠
乘枯摘野豔沈細抽潛
腥遊寺去陟巘尋徑返
穿汀緣雲竹竦竦失路
麻冥冥淫潦忽翻野平
蕪眇開溟防泄塹夜塞
懼衝城晝局及去事戎
轡相逢宴軍伶觥秋縱
兀兀獵旦馳駒

駟從賦始分手朝京忽同舫急時促暗棹戀月留虛亭
畢事驅傳馬居安守牕螢梅花灞水別宮燭驪山醒省
選逮投足鄉賓尚摧翎塵袂又一慘淚皆還雙熒洛邑
得休告華山窮絕陁倚巖睨海浪引袖拂天星日駕此
迴輶金神所司刑泉紳拖修白石劍攢高青磴蘚澹拳
跼梯飈颭伶俜悔狂已昨指垂誠仍鐫銘峨豸忝備列
伏蒲愧分涇微誠慕橫草瑣力摧撞筵疊雪走商嶺飛
波航洞庭下險疑墮井守官類拘囹荒餐茹獠蠱幽夢

感湘靈刺史肅著蔡吏人沸蝗螟點綴簿上字趨踰閭
前鈴賴其飽山水得以娛瞻聽紫樹雕斐疊碧流滴瓏
玲映波鋪遠錦插地列長屏愁欹酸骨死怪花醉蒐磬
潛苞絳實坼幽乳翠毛零赦行五百里月變三十莫漸
階羣振鷺入學誨螟蛉革甘謝鳴鹿罍滿慙磬竝罔罔
抱瑚璉飛飛聯鶴鵠魚鬣欲脫背虬光先照硯豈獨
出醜類方當動朝廷勤來得晤語勿憚宿寒廳
排律用拘體亦是變格調古而詞艷不徒叙致之工

筆墨閒錄曰劉侗云答張徹一詩尤奇麗梅花灞水
一對極有風味

顧嗣立曰此詩通首用對句而以生峭之筆行之便
與律詩大別少陵橋陵詩便是此種

隱居詩話曰李肇國史補載韓愈游華山窮極幽險
心悸目眩不能下發狂號哭投書與家人別華陰令
百計取之方能下沈顏作聲書以為肇妄載豈有賢
者輕命如此余觀退之贈張徹詩云洛邑得休告華

山窮絕陁悔狂已昨指垂戒仍鐫銘則知肇記為信
然而沈顏為妄辯也

御選唐宋詩醇卷二十八

欽定四庫全書

御選唐宋詩醇卷二十九

昌黎韓愈詩三

目錄

薦士

古風

嗟哉董生行

山石

汴泗交流贈張僕射

鳴鴈

雉帶箭

條山蒼

桃源圖

東方半明

謁衡嶽廟遂宿嶽寺題門樓

永貞行

鄭羣贈簞

贈崔立之評事

送區宏南歸

三星行

剝啄行

孟東野失子

欽定四庫全書

御選唐宋詩醇卷二十九

昌黎韓愈詩三

薦士

周詩三百篇雅麗理訓誥曾經聖人手議論安敢到五
言出漢時蘇李首更號東都漸瀰漫派別百川導建安
能者七卓犖變風操逶迤抵晉家氣象日凋耗中間數
鮑謝比近最清奧齊梁及陳隋衆作等蟬噪搜春摘花

弁沿襲傷剽盜國朝盛文章子昂始高蹈勃興得李杜
萬類困陵暴後來相繼生亦各臻閭奧有窮者孟郊受
材實雄鷲冥觀洞古今象外逐幽好橫空盤硬語妥帖
力排奭敷柔肆紆餘奮猛卷海濤榮華肖天秀捷疾逾
響報行身踐規矩甘辱恥媚竈孟軻分邪正眸子看瞭
眊杳然粹而清可以鎮浮躁酸寒漂陽尉五十幾何老
孜孜營甘旨辛苦久所冒俗流知者誰指注競嘲傲聖
皇索遺逸髦士日登造廟堂有賢相愛遇均覆燾况承

歸與張二公迭嗟悼青冥送吹噓強箭射魯縞胡為久
無成使以歸期告霜風破佳菊嘉節迫吹帽念將決焉
去感物增戀嫪彼微水中苻尚煩左右芼魯候國至小
廟鼎猶納郛幸當擇珉玉寧有棄珪瑁悠悠我之思擾
擾風中麝上言愧無路日夜惟心禱鶴翎不天生變化
在啄菹通波非難圖尺地易可漕善善不汲汲後時徒
悔懊救死具八珍不如一簞犒微詩公勿誚愷悌神所
勞

孟郊一詩流之幽逸者耳殊未足踵武諸大家而退之
說士乃甘於肉其自謂嗜善心無寧者此也 橫空盤
硬語妥帖力排冪十字中尤妙在妥帖二字樊宗師文
最奇崛而退之以文從字順許之其亦異乎世之所謂
妥帖者矣

王安石曰吟詩各有所得清水出芙蓉天然去雕飾
此李白所得也或者翡翠蘭苔上未掣鯨鯢碧海中心
杜甫所得也橫空盤硬語妥帖力排冪此韓愈所得也

彥周詩話曰六朝詩人之詩不可不熟讀如芙蓉露
下落楊柳月中踈鍛鍊至此自唐以來無人能及也
退之云齊梁及陳隋衆作等蟬噪此語吾不敢議亦
不敢從

又曰退之云橫空盤硬語安帖力排奐蓋能殺縛事
實與意義合最難能之知其難則可與論詩矣此所
以稱東野也

隱居詩話曰孟郊詩蹇澁窮僻琢削不暇真苦吟而

成觀其句法格力可見矣其自謂夜吟曉不休苦吟鬼神愁如何不自閒心與身為仇而退之薦其詩云榮華肖天秀捷疾逾響報何也

竹坡詩話曰韓退之薦士詩云孟軻分邪正眸子看瞭眊杳然粹而清可以鎮浮躁余嘗讀東野下第詩云棄置復棄置情如刀劍傷及登第則自謂春風得意馬蹄疾一日看盡長安花一第之得失喜憂至於如此宜其雖得之而不能享也退之謂可以鎮浮躁

恐未免過情

李光地曰此薦孟郊之詩而首段叙詩源委極其簡盡李太白便謂建安之詩綺麗不足稱杜子美則自陳梁以下無貶詞故惟韓公之論最得其衷雖然陶靖節詩蟬蛻污濁六代孤唱韓公畧無及之何也此與論文不列董賈者同病猶未免於以辭為主爾顧嗣立曰公此詩歷叙詩學源流自三百篇後漢魏止取蘇李建安七子六朝止取鮑謝餘子一筆抹倒

眼明手竦識力最高唐初格律變於子昂至李杜二公而極所謂李杜文章在光燄萬丈長知公平生最得力於此也後以東野繼之似猶未足當此若公之才大而力雄思沈而筆銳則庶乎可以配李杜而無慙矣

全唐詩話曰李翱薦孟郊於張建封云茲有平昌孟郊正士也伏聞執事舊知之郊為五言詩自前漢李都尉蘇屬國及建安諸子南朝二謝郊能兼其體而

有之李觀薦郊於梁肅補闕書曰郊之五言詩其有
高處在古無上其有平處下顧兩謝韓送郊詩曰作
詩三百首杳默咸池音彼三子皆知言也豈欺天下
之人哉

古風

今日曷不樂幸時不用兵無曰既盛矣乃尚可以生彼
州之賦去汝不顧此州之役去我奚適一邑之水可走
而違天下湯湯曷其而歸好我衣服甘我飲食無念百

年聊樂一日

史記韓信傳曰農夫莫不輟耕釋耒禴衣甘食索隱曰
恐滅亡不久故廢止作業而事美衣甘食此篇結意類
此可謂長歌之哀深於痛哭矣

胡渭曰詩云幸時不用兵此必貞元十四年以前作
也十五年則吳少誠反而大發諸道兵以討之矣本
譏賦役之困民無所逃却言時不用兵正宜甘食好
衣相與為樂辭彌婉而意彌痛山樞萇楚之遺音也

樊汝霖曰安史亂後方鎮相望於內地大者連州十
餘小者不下三四兵驕則逐帥帥強則叛上不廷不
貢往往而是故託古風以寓意觀詩意當在德宗之
世與烽火詩意相為表裏云

嗟哉董生行

淮水出桐柏山東馳遙遙千里不能休淝水出其側不
能千里百里入淮流壽州屬縣有安豐唐貞元時縣人
董生召南隱居行義於其中刺史不能薦天子不聞名

聲爵祿不及門門外惟有吏日來徵租更索錢嗟哉董
生朝出耕夜歸讀古人書盡日不得息或山而樵或水
而漁入厨具甘旨上堂問起居父母不感感妻子不咨
咨嗟哉董生孝且慈人不識惟有天翁知生祥下瑞無
時期家有狗乳出求食雞來哺其兒啄啄庭中拾蟲蟻
哺之不食鳴聲悲傍徨躑躅久不去以翼來覆待狗歸
嗟哉董生誰將與儔時之人夫妻相虐兄弟為讐食君
之祿而令父母愁亦獨何心嗟哉董生無與儔

神味古淡節族自然集中寡二少雙唯琴操間有近之者

俞琰曰古詩長短句盛於太白如蜀道難遠別離等篇實為公所取法者其奇橫偏在用韻處貫下一筆然後截住以足上意如盡日不得息亦獨何心等句是也

山石

山石犖确行徑微黃昏到寺蝙蝠飛昇堂坐階新雨足

芭蕉葉大支子肥僧言古壁佛畫好以火來照所見稀
鋪床拂席置羹飯疎糲亦足飽我飢夜深靜卧百蟲絕
清月出嶺光入扉天明獨去無道路出入高下窮烟霏
山紅澗碧分爛熳時見松櫪皆十圍當流赤足蹋澗石
水聲激激風吹衣人生如此自可樂豈必局束為人羈
嗟哉吾黨二三子安得至老不更歸

以火來照所見稀與嶽廟作神縱欲福難為功畧同於
法則隨手撇脫於意則素所不滿之事即隨處自然流

露也

某氏曰東坡詩云瑩確何人似退之意行無路欲從
誰宿雲解駁晨光漏獨見山紅澗碧時皆采公此篇
中語也

顧嗣立曰七言古詩易入整麗而亦近平熟自老杜
始為拗體如杜鵑行之類公之七言皆祖此種而中
間偏有極鮮麗處不事雕琢更見精采有聲有色自
是大家元遺山論詩絕句云有情芍藥含春淚無力

薔薇卧晚枝拈出退之山石句始知渠是女郎詩真
篤論也

汴泗交流贈張僕射

汴泗交流郡城角築場千步平如削短垣三面繚逶迤
擊鼓騰騰樹赤旗新秋朝涼未見日公早結束來何為
分曹決勝約前定百馬攢蹄近相映毬驚杖奮合且離
紅牛纓紱黃金羈側身轉臂著馬腹霹靂應手神珠馳
超遙散漫兩閒暇揮霍紛紜爭變化發難得巧意氣粗

謹聲四合壯士呼此誠習戰非為劇豈若安坐行良圖
當今忠臣不可得公馬莫走須殺賊

神采飛動結有忠告便比雉帶箭高一格

顧嗣立曰曹子建白馬篇仰手接飛猱俯身散馬蹄
杜子美詩走馬脫轡頭手中挑青絲捷下萬仞岡俯
身試塞旗側身轉臂語意本此發難得巧即雉帶

箭所謂將軍欲以巧伏人盤馬彎弓惜不發是也舊
注難作去聲引張良發八難解大謬

卷二十九
某氏曰公集有諫張僕射擊毬書此詩云此誠習戰
非為劇豈若安坐行良圖蓋諷之也

鳴鴈

嗷嗷鳴鴈鳴且飛窮秋南去春北歸去寒就暖識所依
天長地濶棲息稀風霜酸苦稻粱微毛羽摧落身不肥
徘徊反顧羣侶違哀鳴欲下洲渚非江南水闊朝雲多
草長沙軟無網羅閒飛靜集鳴相和違憂懷惠性匪他
凌風一舉君謂何

王伯大曰公在徐州與孟東野書有曰去年脫汴州
之亂遂來於此主人與余有故居余符離睢水上及
秋將辭去云云主人謂建封公在徐鬱鬱不得志見
於書與詩者如此蓋託鴈以自喻也

雉帶箭

原頭火燒靜兀兀野雉畏鷹出復沒將軍欲以巧伏人
盤馬彎弓惜不發地形漸窄觀者多雉驚弓滿勁箭加
衝人決起百餘尺紅翎白鏃隨傾斜將軍仰笑軍吏賀

五色離披馬前墮

篇幅有限而盤屈跳盪生氣遠出故是神筆

容齋三筆曰昌黎雉帶箭詩東坡嘗大字書之以為
妙絕予讀曹子建七啓論羽獵之美云人稠網密地
逼勢脅乃知韓公用意所來處

野雉畏鷹出復沒方嵩卿本作伏欲沒朱子考異云
雉出復沒而射者彎弓不肯輕發正是形容持滿命
中之巧毫釐不差處改作伏欲神采索然矣

顧嗣立曰將軍欲以巧伏人盤馬彎弓惜不發二句無限神情無限頓挫公蓋示人以運筆作文之法也至其全首波瀾委曲細微熨貼王留耕所謂寫物之妙其狀如在目前信然信然

沈德潛曰李將軍度不中不發發必應弦而倒審量於未彎之先此矜惜於已彎弓之候總不肯輕見其技也作詩作文亦須得此意

條山蒼

條山蒼河水黃浪波汙汙去松栢在山岡

桃源圖

神仙有無何眇芒桃源之說誠荒唐唐流水盤迴山百轉
生綃數幅垂中堂武陵太守好事者題封遠寄南宮下
南宮先生忻得之波濤入筆驅文辭文工畫妙各臻極
異境恍惚移於斯架巖鑿谷開官室接屋連牆千萬日
羸顛劉蹶了不聞地坼天分非所恤種桃處處惟開花
川源近遠烝紅霞初來猶自念鄉邑歲久此地還成家

漁舟之子來何所物色相猜更問語大蛇中斷喪前王
羣鳥南渡開新主聽終辭絕共悽然自說經今六百年
當時萬事皆眼見不知幾許猶流傳爭持酒食來相饋
禮數不同罇俎異月明伴宿玉堂空骨冷魂清無夢寐
夜半金雞啁哳鳴火輪飛出客心驚人間有累不可住
依然離別難為情船開棹進一迴顧萬里蒼蒼煙水暮
世俗寧知偽與真至今傳者武陵人

一起一結善占地步

彥周詩話曰退之桃源行云種桃處處皆開花川源
近遠烝紅霞狀花卉之盛古今無人道此語

俞瑒曰公七言古詩少用對句此篇諸對亦甚奇偉
沈德潛曰玉堂即金堂玉室意以神仙目之

東方半明

東方半明大星沒獨有太白配殘月嗟爾殘月勿相疑
同光共影須臾期殘月暉暉太白睽睽難三號更五點
與鐘鳴漏盡意同

韓醇曰此詩與煌煌東方星興寄頗同蓋指順宗即位不能親政而憲宗在東宮之時也

某氏曰時賈耽鄭珣瑜二相皆天下重望王叔文用事相繼引去此詩所以喻東方半明大星沒也韋執誼為叔文汲引此詩所以喻獨有太白配殘月也順宗已厭機政執誼叔文尚以私意更相猜忌所以有嗟爾殘月勿相疑同光共影須臾期也及憲宗立而叔文執誼竄猶東方明而殘月大白滅此詩所以喻

殘月暉暉太白睽睽雞三號更五點也意微而顯誠
得詩人之旨

謁衡嶽廟遂宿嶽寺題門樓

五嶽祭秩皆三公四方環鎮嵩當中火維地荒足妖怪
天假神柄專其雄噴雲泄霧藏半腹雖有絕頂誰能窮
我來正逢秋雨節陰氣晦昧無清風潛心默禱若有應
豈非正直能感通須臾靜掃衆峰出仰見突兀撐青空
紫蓋連延接天柱石廩騰擲堆祝融森然魄動下馬拜

松柏一逕趨靈宮粉牆丹柱動光彩鬼物圖畫填青紅
升階偃僂薦脯酒欲以菲薄明其衷廟令老人識神意
睢盱偵伺能鞠躬手持盃珎導我擲云此最吉餘難同
竄逐蠻荒幸不死衣食纔足甘長終侯王將相望久絕
神縱欲福難為功夜投佛寺上高閣星月掩映雲腫朧
猿鳴鐘動不知曙果果寒日生於東

東坡所謂能開衡山之雲者本此

沈德潛曰橫空盤硬語安帖力排羣此詩足當此語

王伯大曰公兩謫南方初自陽山北還過衡在永貞
元年八月過潭適當殘秋陪杜侍御遊湘西寺詩云
是時秋向殘是也今云我來正逢秋雨節故知此詩
是陽山還時作後自潮州還移刺袁州則元和十五
年十月蓋未嘗過衡據袁州謝表云去年正月貶授
潮州刺史其年十月準例量移云云即自潮徑當來
袁又未嘗遇秋雨節時也蘇東坡觀市詩云潮陽太
守南遷歸喜見石廩堆祝融痛言之耳

永貞行

君不見太皇亮陰未出令小人乘時偷國柄北軍百萬
虎與貔天子自將非他師一朝奪印付私黨慄慄朝士
何能為狐鳴梟噪爭署置睚眦跳踉相撫媚夜作詔書
朝拜官超資越序曾無難公然白日受賄賂火齊磊落
堆金盤元臣故老不敢語晝卧涕泣何沅瀾董賢三公
誰復惜侯景九錫行可歎國家功高德且厚天位未許
庸夫干嗣皇卓犖信英主文如太宗武高祖膺圖受禪

登明堂共流幽州鯨死羽四門肅穆賢俊登數君匪親
豈其朋郎官清要為世稱荒郡迫野嗟可矜湖波連天
日相騰蠓俗生梗瘴癘烝江氛嶺祲昏若凝一蛇兩頭
見未曾怪鳥鳴喚令人憎蠱蟲羣飛夜撲燈雄虺毒螫
墮股肱食中置藥肝心崩左右使令詐難憑慎勿浪信
常兢兢吾嘗同僚情可勝具書目見非妄徵嗟爾既往
宜為懲

前幅天昏地暗中間日出冰消閔至後幅又如淒風苦

雨文生於情變幻如是

蔡寬夫詩話曰子厚禹錫於退之最厚善然退之貶
陽山不能無疑赴江陵途中寄三學士云同官盡才
俊偏善柳與劉或慮語言泄傳之落冤讐二子不宜
爾將疑斷還不及其為永貞行憤疾至云數君匪親
豈其朋又曰吾嘗同僚情可勝則亦見其坦夷尚義
待朋友始終也

困學紀聞曰少陵善房次律而悲陳陶一詩不為之

隱昌黎善柳子厚而永貞行一詩不為之諱公議之
不可掩也如是

顧嗣立曰此詩前半言小人放逐之為快後半言數
君貶謫之可矜蓋為劉柳諸公也舊注專指夢得似
未必然然夢得貶連州而公曾令陽山以其書目見
句為證於義亦通姑存其說以俟考

鄭羣贈簞

蘄州笛竹天下知鄭君所寶尤瓌奇攜來當畫不得卧

一府傳省黃瑠璃體堅色淨又藏節盡眼凝滑無瑕疵
法曹貧賤衆所易腰腹空大何能為自從五月困暑濕
如坐深甕遭烝炊手磨袖拂心語口慢膚多汗真相宜
日暮歸來獨惆悵有賣直欲傾家資誰謂故人知我意
卷送八尺含風漪呼奴埽地鋪未了光彩照耀驚童兒
青蠅側翅螽虱避肅肅疑有清飈吹倒身甘寢百疾愈
却願天日恒炎曦明珠青玉不足報贈子相好無時衰
俛佇怨歌云常恐秋節至涼風奪炎熱此云却願天日

恒炎曦同一語妙

顧嗣立曰此詩每用反襯意見奇如攜來當畫不得卧却願天日恒炎曦等句也賦物之妙直從細瑣處體貼而出

沈德潛曰却願天日恒炎曦與攜來當畫不得卧俱透過一層法

樊汝霖曰唐孔戣松記云退之豐肥善睡每來吾家必命枕簟而沈存中筆談亦云世畫韓退之小面而

美顏著紗帽此乃江南韓熙載爾熙載謚文靖江南人謂之韓文公因此遂誤以為退之退之肥而少顏此詩有腰腹空大及慢膚多汗之語二說信然

贈崔立之評事

崔侯文章苦捷敏高浪駕天輸不盡曾從關外來上都
隨身卷軸車連軫朝為百賦猶鬱怒暮作千詩轉道緊
搖毫擲簡自不供頃刻青紅浮海蜃才豪氣猛易語言
往往蛟螭雜螻蚓知音自古稱難遇世俗乍見那妨哂

勿嫌法官未登朝猶勝赤尉長趨尹時命雖乖心轉壯
技能虛富家逾窘念昔塵埃兩相逢爭名齟齬持矛楯
子時專場誇觔距余始張軍嚴鞬鞞爾來但欲保封疆
莫學龐涓怯孫臏竄逐新歸厭聞鬧齒髮早衰嗟可閔
頻蒙怨句刺棄遺豈有賢官敢推引深藏篋笥時一發
戢戢已多如束筍可憐無益費精神有似黃金擲虛牝
當今聖人求侍從拔擢杞梓收楷箇東馬嚴徐已奮飛
枚臯即召窮且忍復聞王師西討蜀霜風冽冽摧朝菌

走章馳檄在得賢燕雀紛拏要鷹隼竊料二塗必虛一
豈比恒人長蠢蠢勸君韜養待徵招不用雕琢愁肝腎
牆根菊花好沽酒錢帛縱空衣可準暉暉簷日暖且鮮
臧臧井梧疎更殞高士例須憐麴蘖丈夫終莫生畦畛
能來取醉任喧呼死後賢愚俱泯泯
可憐無益費精神為千古文人喟息

漁隱叢話曰立之詩有不工處故退之以蛟螭雜螻
蚓譏之

送區宏南歸

穆昔南征軍不歸蟲沙猿鶴伏以飛洶洶洞庭莽翠微
九疑鑱天荒是非野有象犀水貝璣分散百寶人士稀
我遷於南日周圍來見者衆莫依倚爰有區子熒熒暉
觀以彛訓或從違我念前人譬葑菲落以斧引以繆徽
雖有不逮驅駢駢或採於薄漁於磯服役不辱言不譏
從我荊州來京畿離其母妻絕因依嗟我道不能自肥
子雖勤苦終何希王都觀闕雙巍巍騰跼衆駿事鞍韉

佩服上色紫與緋獨子之節可嗟唏母附書至妻寄衣
開書拆衣淚痕晞雖不勅還情庶幾朝暮盤羞惻庭闈
幽房無人感伊威人生此難餘可祈子去矣時若發機
蜃沈海底氣昇霏彩雉野伏朝扇輦處子窈窕王所妃
苟有令德隱不腓況今天子鋪德威蔽能者誅薦受機
出送撫背我涕揮行行正直慎脂韋業成志樹來頎頎
我當為子言天扉

分散百寶人士稀道盡西南邊傲地脉風氣柳州所謂

少人而多石也雖不勅還情庶幾語意深婉遊子讀此可以聽於無聲矣

張耒曰古人作七言詩其句脈多上四字而下以三字成之退之乃變句脈以上三下四如落以斧引以纒徽雖欲悔古不可捫是也

方崧卿曰九疑言饒天洪濤言春天皆奇語也李光地曰公在陽山有區冊在江陵又有區宏皆相從不忍舍故宏之從公於京而歸也詩以送之惓惓訓勗

歸於正直可咏可感

三星行

我生之辰月宿南斗牛奮其角箕張其口牛不見服箱
斗不挹酒漿箕獨有神靈無時停簸揚無善名已聞無
惡聲已謹名聲相乘除得少失有餘三星各在天什伍
東西陳嗟汝牛與斗汝獨不能神

俞琰曰奇趣却從大東之詩來變化自妙用韻凡五
轉似古歌謠

東坡志林曰韓退之詩我生之辰月宿南斗乃知退之以磨蝎為身宮僕以磨蝎為命宮平生多得謗譽殆同病也

剥啄行

剥剥啄啄有客至門我不出應客去而嗔從者語我子胡為然我不厭客困於語言欲不出納以堙其源空堂幽幽有枯有莞門以兩版叢書於間窅窅深塹其墉甚完彼寧可鑒此不可干從者語我嗟子誠難子雖云爾

其口益蕃我為子謀有萬其全凡今之人急名與官子
不引去與為波瀾雖不開口雖不開關變化咀嚼有鬼
有神今去不勇其如後艱我謝再拜汝無復云往追不
及來不有年

方崧卿曰韓文與多作以他文見者非一詩之子歸
不我以注以猶與也朱子考異云按陸宣公奏議亦
然如云未審云云以否之類是也然當作與為正
某氏曰公被讒出為陽山至是召還又有謗之者故

三星行云名聲相乘除得少失有餘剝啄行云我不
厭客困於語言欲不出納以堙其源各有所激云爾
歐陽文忠擬剝啄行寄少師云剝剝復啄啄柴門驚
鳥雀故人千里駕信士百金諾云云公遠讒避謗欲
謝客以堙其源故深其塹堅其墉要為不可干者而
歐陽則歸老故鄉欣然喜客之至是以其辭不同如
此

孟東野失子并序

東野連產三子不數日輒失之幾老念無後以悲其
友人昌黎韓愈懼其傷也推天假其命以喻之

失子將何尤吾將上尤天女實主下人與奪一何偏彼
於女何有乃令蕃且延此獨何罪辜生死旬日間上呼
無時聞滴地淚到泉地祇為之悲瑟縮久不安乃呼大
靈龜騎雲款天門問天主下人薄厚胡不均天曰天地
人由來不相關吾懸日與月吾繫星與辰日月相噬齧
星辰陪而顛吾不女之罪知非女由因且物各有分孰

能使之然有子與無子禍福未可原魚子滿母腹一一
欲誰憐細腰不自乳舉族長孤鰥鵠泉啄母腦母死子
始翻蝮蛇生子時坼裂腸與肝好子雖云好未還恩與
勤惡子不可說鵠泉蝮蛇然有子且勿喜無子固勿歎
上聖不待教賢聞語而遷下愚聞語惑雖教無由悛大
靈頓頭受即日以命還地祇謂大靈女往告其人東野
夜得夢有夫玄衣巾闔然入其戶三稱天之言再拜謝
玄夫收悲以歡忻

龜筮傳祝詞云假之玉靈夫子而上行於天下行於淵
詩以大靈發端本此

王伯大曰黃魯直嘗書此詩遺石君美君美失子云
時以觀覽可用亂思而紓哀究觀物理其實如此大
槩因果耳退之救世弊故并因果不言然此一段文
意乃是涅槃經中佛語退之嘗言不能無所不讀未
有能為大儒者其弗信矣乎魯直所云如此

俞場曰用韻本主先字兼入真文元寒刪諸韻是古

韻也與此日足可惜一首同法

顧嗣立曰按孟東野集有悼幼子詩云負我十年恩
次爾千行淚杏殤詩畧云兒生月不明兒死月始光
此誠天不知翦棄我子孫又云病叟無子孫獨立猶
束柴其詞甚可哀也

御選唐宋詩醇卷二十九